

重修兩淮鹽法志

兩淮鹽法志卷三十三

場竈門

鹽色

上

凡論鹺政者首重疏銷疏銷之法曰緝私捍外患也曰整頓鹽色治本原也兩淮之鹽北曬而南煎論其品質則淮北三場鹽色爲潔淮南二十場高下殊等曰眞梁曰正梁曰頂梁皆名尖鹽其次曰和鹽尖與次雜揉故謂之和其下者腳鹽質黑銷滯商民兩病之故自沈葆楨創辦重淋爲自強敵私之計意亦善矣乃行之未久岸商籲請停派故知利弊循環相因而生綰場務者不

可不加意也志鹽色

淮南鹽色上

同治三年六月湖北督銷局道員杜文瀾稟竊查古今鹺
略品天下之鹽以淮南之熬於盤者爲上今則色溜黑
而雜泥沙人謂場分不同鹽有高下地氣滷氣使然職
道曾任海通泰三州分司確知鹽色之黑白可以人力
爲非盡關於地氣滷氣也初煎之鹽無不潔白煎成後
潑於竈邊毫無遮護人畜任意蹂踐之竈間徧地黑灰
風起飛揚勻灑堆間鹽遂變色又竈戶運鹽入垣堆空
地許久俟垣商掀量過桶始收入廩間又捆鹽時和以

碱片就地掃刮餘鹽亦裝入包內蓋身成鹽後堆竈入垣出場凡三次簸揚鏟削於泥地之中豈無灰土沾染故鹽色本白迨運至各岸則變爲黑色而有泥沙不知者謂商販船戶羈和實則商販深慮鹽之不潔何肯羈和船戶間有羈和只羈水而不羈泥沙也間嘗訪詢產上色鹽各場蓋亦有道掃灰滴滴時或存於滴井或多挖一池多澄一次則滴更清點鹽時所用皂角水淘盡皮渣則鹽更潔潑鹽堆鹽捆鹽悉用蓆片滿鋪則鹽不著土未上廩時多加蓆片遮蓋則鹽不沾灰只此數端色卽潔白其講求甚易無如場商竈戶疲懶性成吝惜

工本以爲向來鹽色如是何必加工遂致下色各場出
鹽永爲下色而上色各場亦漸致減色前數年各販零
運頗選真梁泰棧各商人亦知加意講求務品色之高
下是以初運楚西兩岸較行綱鹽時鹽色爲佳本年認
運較多棧鹽出售較易卽不容商販挑選各商販以到
岸總按先後派賣亦不必格外選求於是新章所到之
鹽絕無上色更有以碱片充數妄引綱鹽章程希圖提
輪者湖北所行川私味不及淮而色則甚白街市各店
以川淮兩鹽並列門首黑白分明買鹽之人孰肯捨白
取黑此淮鹽絀銷之一大端也應請札飭淮運司嚴飭

分司場官並總局各棧商嗣後收鹽捆鹽務須加意講求如非上色白鹽不准收垣不准捆運則各竈戶自知護惜格外加工雖下色各場亦可改觀而復熬盤上品之舊近來桶價已屬昂貴難再議加或將中下色之鹽酌減百數十文以津貼上色之鹽使竈戶有利可圖更可認真煎埽應飭場官各就竈戶妥爲籌議經鹽政會國藩批查淮鹽色味本佳祇因各垣商吝惜工本並不加意講求以致沾染灰土兼雜泥沙鹽色日壞必須認真整頓方足以敵川私而保淮價該道所稟各情確中時弊仰候札飭淮運司嚴督分場局棧實力講求嗣後

非潔白淨鹽不准收垣不准捆運並將下色鹽價酌減以津貼上色之鹽由各場員各就竈情議稟運司策核詳辦

同治三年十二月運司忠廉詳據淮南總局稟稱奉札飭據淮南商人吉同興等稟查通泰二十場同一攤灰淋滷成鹽之後色各不同以通屬之餘東呂四等場爲最上名曰真梁其次則通屬之餘西金沙石港及泰屬新興之上岡曰冲梁又稱爲頂梁又其次則通之豐利枰茶泰之丁谿小海草堰劉莊伍祐新興廟灣名曰上白梁而枰茶伍祐丁谿南洋又微次最下者爲通之李堡

角斜掘港秦之富安安豐梁垛東臺何垛名曰白梁此雖同出於海而成於天者莫可強也真梁質輕色白竈戶以微火緩煎而成既無腳鹽亦無碱片其下者則皆分爲三等色白者名曰尖鹽約居十之七八結於鍬底如炊飯之有鍋焦者名曰碱片又曰安鹽約居十之一至於池底之滷本已不潔鍬底之鹽更爲塵土所聚色黑如泥名曰次鹽又爲腳鹽約居十之一二不等此其大較也竈戶成鹽不能不悉售之於商場商於收鹽入垣之時將尖次碱三項分別堆儲各不相雜真梁頂梁上白梁皆銷於楚岸白梁銷於西岸安鹽則楚西並行

惟次鹽則銷售甚難間有以十之一二和售西岸及江
甘等食岸者然所收多而所售少每有堆積在垣數
十年之久非遇各場歉產之年不能售去者故在前之
場商划記成本皆剔除次鹽專就尖碱核算運商買鹽
亦只論鹽之新堆老堆不復計及鹽色以各場之鹽色
自有一定尖次碱判然各別無庸考究也軍興以後楚
西旣無專岸之商販鹽皆零星小販只圖價賤場商慮
次鹽之無售於是不復分別入垣之時卽將次鹽和入
尖鹽並將碱鹽搥碎磨入統名曰和鹽轉無尖次碱之
名竈戶以場商不復分別而次鹽愈多色卽愈黑且各

垣無有餘之本甫收卽售滷未行盡色旣不鮮質亦糟
爛不分顆粒卽向無次碱之真梁亦復花雜不淨此鹽
色之所以大遜於前非產於地者有今昔不同也今蒙
籌及整頓實爲敵鄰私復舊規之第一要務商等感佩
之餘公同籌議惟有入垣之時先將尖鹽碱鹽次鹽三
項仍前分別嚴諭竈戶務於煎鹽之時澄滷必清苦蓋
必厚庶尖鹽可期潔白然後再議堆儲行滷非厯過霉
伏不得捆重則收鹽之法悉復前制自運鹽之時不慮
歧異矣惟剔除黑次則入垣十引之鹽出垣者僅八引
餘耳其一成餘卽爲難售之物收價不能減輕不得不

於賣價扯算必將此一成餘之價攤入八成餘之內方
不至虧折至於堆過霉伏行滷已不免折耗而歷一時
卽有一時之月利商等湊集之本方慮不能轉輸何能
再爲估擱卽以分半息計之每引收鹽成本約計四千
文估擱一年已需利七百二十文今牌價旣奉核定商
等之本利皆有一定之範圍而剔除黑次則成本已增
十之一矣堆過霉伏則月利又增十之二矣其應如何
分別色之尖次堆之新老明定價目俾有遵循應請轉
詳定案等情前來查從前淮南各商認引卽各有認岸
買鹽時莫不自顧銷路鹽隨岸配旣按產鹽場分分別

眞梁沖梁上白梁白梁四等又分尖次碱三項其中更有新堆老堆之別價卽因之以定等差自改行稅鹽以來販戶只知買鹽不別銷路遂無分高下價皆一律場商慮虧成本因將碱次和入尖鹽售運又急於轉輸更不復有老堆之鹽該商等所稟均係實在情形惟黑次雖經剔除遇銷旺產歉之時究有售去之望並非棄物似不至暗虧成本十分之一新鹽入垣原應堆儲洵涵亦未便按月計利卑職等悉心察核酌中定斷擬分別略加牌價俾場商江販兩得其平餘東呂四最高之鹽每包加錢七十文餘西金沙石港上新興每包加錢六

十文豐利小海新興草堰劉莊廟灣加錢五十文枰茶
伍祐南洋丁谿加錢四十文李堡角斜掘港富安安豐
梁埭加錢三十文碱片則概照原價不加老堆則准其
按年議價如此明定等差場商既無慮虧本又各期易
售自必分別堆儲不使黑次和人仍飭場員嚴督竈戶
澄清滷池如法辦煎鹽色自可復舊經鹽政曾國藩批
允

同治四年閏五月署鹽政李鴻章檄行湘岸近聞湘岸所
到之鹽鹽色不一甚致攙和泥沙銷數頓滯非商販將
低鹽以欺水販卽船戶因盜賣而生弊端亟應整頓以

清弊源昨據湖北督銷局黃道稟新章定價每百斤售
庫平寶紋三兩五錢昨日爲派檔之期各商沿照向章
手持樣鹽紛紛請定售價上色每石加售八分上中色
每石加售六分中色加售二分迨委員密查各船鹽色
閒有不符者難免情弊增價則與定章不符不增則商
情不愜僉謂將來均辦下鹽更難收敵川之效職道籌
思再四在漢則分鹽色黑白在淮則判場垣高低大抵
南場之鹽有上色亦有中色北場之鹽間有中色而下
色最多運商採辦上色成本自然稍重擬請飭令招商
局將各商所辦場分確切查明以極低之安豐梁垛東

臺何埭等場楚岸向稱白梁者每石定價三兩五錢其
草堰丁谿伍祐富安向稱上梁者酌加二分新興耕茶
掘港角斜向稱頂梁者再加二分上岡提篩新興及餘
西金沙豐利向稱充眞者再加二分餘東向稱次眞梁
者再加二分呂四向稱眞梁者再加二分鹽分六等價
增一錢由招商局按船分別註明護照鹽船到漢又由
鄂局督同行商核對儻有驛和潑水將低作高情弊仍
隨時查究至上色成本較重增價一錢應否免提盈餘
以恤商情之處恭候核定等情當經本署部堂批第四
條分場定價洵是杜弊之法各商在泰買鹽時本有場

分可稽祇因護照內未經註明遂致到岸紛紛爭論仰
候札飭楚岸招商局將各商已經開江尙未出售之鹽
限五日內開明場分由輪船專遞該局核辦一面呈報
本署部堂查考鄂湘兩岸向銷上色見在川鹽色更潔
白欲求敵川之效非整頓鹽色不可經會前部堂諄諄
告誡奚啻三令五申並批明下色之鹽不准再行運往
在案嗣後楚岸未經開江之鹽應由招商局在於護照
內註明場分並候札飭總棧委員程守逐票查明凡極
低之安梁東何等場次鹽毋許運往楚岸至所增一錢
價銀爲數不多免提盈餘以示體恤等因印發並

岸招商局瓜州總棧程守在案湘岸應卽查照鄂岸章程一律辦理以期弊除銷暢

同治四年十一月鹽政李鴻章示照得江西向銷之鹽其色稍次係較餘呂極白之鹽爲次非用黑鹽運往見據江西督銷局稟近來各商所辦之鹽有鹽色極黑者挨售時水販不願領受勉強派搭頗費唇舌查目下鄰私未堵方慮鹽色不敵豈容再任奸商運售黑鹽貪買價之便宜阻到岸之銷路致使銷滯課絀合行出示曉諭該商等切勿再運黑鹽致礙岸銷

同治七年六月湖北督銷局程桓生稟鄂岸各路水販向

係講求鹽色分別真梁正梁頂梁定價出售以便各販
指買茲查漢鎮存河引鹽正梁頂梁二色爲數尙多足
敷銷市此外真梁一色不及六十引職道見已赴樊查
辦堵緝潞私尤須提撥真梁飭由各商運樊濟銷以敵
鄰私而疏官引若非趕運真梁來漢誠恐缺乏堪虞查
丙寅秋綱運鄂引鹽已據淮南總局申報開江約共一
百餘票核計未開運者尙有十餘票應請迅飭淮運司
轉飭各商多捆真梁剋期運漢以資接濟將來接開丁
卯春綱亦須飭令寬備真梁運鄂庶可以順販情而廣
銷路經鹽政曾國藩批允

同治八年正月湖北督銷局程桓生等詳據鄂岸運商吉祥誠等稟稱竊商等自長江准予拖帶之初卽倡辦淮鹽赴楚試行無如鄂岸食川日久向銷下色之區亦需辦上色而商等所辦多係和鹽質嫩色低萬難敵私減價售脫故元二三年票販折本者居多迨及九洑洲克復蒙曾爵憲核定循環章程以期商有把握則辦運踴躍數年以來漸有起色去臘沐督鹽憲批令運商提本濟垣商等均各遵依無異是運之體場者無所不至近日駭聞有挨輪派買之議竊以此事僅可行於西皖湘三岸而不可行之於鄂岸何也三岸向無專銷眞梁馬

頭鄂岸則安襄鄖荆施宜等府均係真梁專岸況此時
川潞充斥敵私喫緊之際萬不能爲恤窮垣而誤大局
至下色雖東何梁安富五場已奉批停辦其伍祐次興
劉莊李堡及正梁和鹽亦均難售舊歲有沈泰和同豐
等商誤辦和鹽輪檔數月無人承買轉運至武穴仍復
滯銷迨後極力設法始行售脫此前車之鑒該垣商等
藉口殺價得利實屬傷心之語夫運鹽者商銷鹽者販
垣能在瓜派商之買商能在漢派販之買乎此議一行
將來挨輪之鹽永無售罄之期且禦外必先安內旣
知場之當恤亦思運之難售縱商等勉遵新議其如水

販之不能勒買攤銷何徒棄引地於私梟兩損何益擬
請將餘呂眞梁專運鄂岸勿須在瓜歸輪以便分運樊
沙敵川敵潞其次和各鹽亦請聽商自便邀免勒派等
情據此查該商等所稟自係爲疏銷敵私起見惟鄂湘
兩岸皆重鹽色故眞梁銷售最易該商等欲以餘呂眞
梁專運鄂岸未免偏執惟有請將餘東呂四向產眞梁
場分飭令設法多辦眞梁接濟運銷不致有脫檔之虞
則淮綱可以暢行而私鹽亦可漸息經鹽政馬新貽批
瓜棧見定輪章係分尖和碱各爲一輪以尖鹽濟鄂湘
銷路復因伍祐尖鹽色次並據續詳搭鄂三成運往武

穴銷售是瓜棧所定輪章於鄂湘運販毫無不便至挨輪章程詳敘預付鹽價案內業已行知續詳伍祐尖鹽應歸另輪一案抄黏飭發所請向產真梁場分飭令設法多備見在鄂岸議禁川私亟須上色真梁趕運濟銷仰候札飭淮運司嚴飭呂四餘東各場認真督產毋稍貽誤

同治八年四月鹽政馬新貽批瓜棧詳尖鹽挨輪配派數目零星諸多不便酌擬變通一案查瓜棧輪章分尖和碱爲三輪運商憑色買運洵爲至善之策惟配派一層略有窒礙蓋運商既付五成鹽價之後其中或因雇船

未齊或因措借未全或願買眞梁正梁等項上色適值輪內並無此鹽則須守待下輪皆事所必有今以繳價之先後爲配派之次第則運商買鹽之期不能自主商人噴有煩言殆由於此若謂一票必須配一場之鹽則四五年間岸銷暢旺場場缺鹽類皆湊數買運何以當時並無異議也茲來詳又擬到輪之鹽配不足數則提輪後之同場者以配之轉恐開商人越輪之漸本部堂悉心參酌該棧已定輪章萬不可再事更張仍應分別尖和碱爲三輪以到棧先後爲賣鹽次第每日到尖鹽若干和鹽若干碱鹽若干按船按色逐日榜示棧門總

須俟先到之船賣完再賣後到之船以次挨賣不准稍有紊越其已付半價之運商買鹽遲早悉聽其便惟餘呂真梁鹽色最佳凡值真梁到輪之時眾商爭買仍易啟加價預定之弊儻因鹽少商多不能徧給應卽就本日認買各商掣籤給運以免居奇其掣籤之法俟此案定後再由該司道會議稟核如此果定挨輪杜場商之暗中增跌刪除配派聽運商之便於轉輪似較公允而少流弊此事頗關場運大局應由該棧與運司妥商熟計會銜具詳方昭周密本部堂此批究竟是否允協講求不厭精詳仰候鈔發方運司會同該道和衷確核如

意見相同卽行聯銜會詳定案以資遵守若批內尙有未妥之處亦不妨據實直陳也再該棧所收五成鹽價已發場商若干未據具報應自四月起備具旬報兩扣一移司署一送本部堂以重稽核旋經運司方濬頤瓜棧程國熙詳伏查西皖食岸向銷和鹽平江辰州專銷碱鹽近來西岸亦閒有請買碱鹽者該二項鹽色各場相同岸價亦復一律遵辦奉憲批以次挨買足可照行第角斜李堡和鹽每包牌價一千八十五文較東何牌價每包貴錢三十文較安豐貴錢十文較富安貴錢十文當輪之時運商嫌其太貴不無觀望擬請酌中定議

此後角斜李堡和鹽以奉批之日起每包減牌價十五文以昭平允而免沮滯至尖鹽一項專銷鄂湘統查湘鄂兩岸每年定行二十四萬引通泰二十場每年所產尖鹽亦祇二十三萬引計餘呂真梁每年約二萬八千引豐利等正梁每年約十一萬引角斜等頂梁每年九萬引以十成計則頂梁四成真梁正梁尙有六成也湘鄂同一講求鹽色而情形又自不同湘岸有復煎之舉而復煎者亦須色潔而質老者爲宜擬請湘商買鹽定以買真梁正梁五成買頂梁五成其願買頂梁五成以上及全票頂梁者聽鄂岸漢局銷七成武穴留三成

武穴鹽色可以稍次擬請鄂商買鹽定以買真梁正梁
七成買頂梁三成其願買頂梁三成以上及全票頂梁
者聽統按場鹽到日挨號請買不准紊越此後尖鹽到
棧卽將餘呂並豐利等正梁按到日先後統列一榜將
角斜等頂梁按到日先後另列一榜聽運商按成配買
惟餘呂當輪仍遵憲批令繳銀五成之商一同掣籤實
與場運大局均有裨益經鹽政馬新貽批披閱會議覆
詳於保價之中力求便商之道棧輪次第毫不紊越另
就尖鹽分別真梁正梁爲一輪頂梁爲一輪酌定來數
聽鄂湘運商憑色承買其和鹽之牌價稍貴者則略減

以昭公平餘呂之鹽色最上者則籤掣以免爭執又立
整頓鹽色並場官記過章程思議周帀確中肯綮該司
蒞任未久於淮鹺情形已極透澈具見虛心採訪遇事
講求該司道辦事實心眾所共知此次會同熟籌悉臻
妥協以後必能和衷共濟永保棧輪深以爲慰自此詳
批定場運各商均不准再有妄議仰卽出示曉諭並候
通飭鄂湘西皖四岸一體知照餘悉照所議辦理

同治八年五月鹽政馬新貽札前據該司棧等會詳挨輪
章程內聲稱此後到輪之鹽如果鹽色不佳有礙銷路
准運商稟明由棧查看如正梁頂梁不佳則降入和鹽

和鹽泥黑碱片毛碎則發回本場另重場官分別記過
撤委等情極爲切當卽經批准照辦在案茲查湘鄂銷
數之滯半由淮鹽鹽色太次鄂岸見當議敵鄰私尤需
上色好鹽方能收敵川之效講求鹽色係分司場員專
責該司道卽便嚴飭通泰兩分司通飭各場務須督商
將各垣鹽色實力講求該司道並卽隨時會派各員查
驗到棧鹽色儻有不潔之鹽一經查出務照新章分別
遞降發回並將場官詳請記過撤委必須照章嚴辦一
二方足以示懲儆勿稍徇縱

同治八年九月瓜棧道員薛書常稟前奉定章按照到日

先後挨號請買不准紊越等因歷經遵辦在案茲有當輪之次新興正梁四百九十引出榜半月各運商嫌其鹽色低次不肯承買飭委查看鹽色實在低次正在設法間據鄂岸運商福祥杭聚和大德吉立興等稟稱商等承運鄂鹽各五百引本應遵章挨買惟見有當輪之次新興四百九十引到輪半月無人過問實因鹽色不合岸銷商等趕運何堪久待再四思維公同籌議新興之後有到輪之枹茶九百九十引擬請以次新興留配武穴以到輪之枹茶配運漢岸福祥買枹茶二百三十引搭配次新興一百五十引杭聚和買枹茶三百四十

引搭配次新興一百六十引大德買拊茶三百四十引
搭配次新興一百六十引吉立興已掣真梁二百五十
引應配買拊茶八十引次新興二十引再搭買當輪頂
梁一百五十引仍各合三成配運之數留運武穴旣不
越乎輪規又不礙於銷路但原定章程武穴搭銷頂梁
三成而次新興尙屬正梁爲此籲請略予變通批示遵
行等情除核准配搭領運外惟當整頓鹽色之際如全
拘輪章則該場商運到低鹽與高鹽一樣挨輪售賣旣
不足以示炯戒而運商不肯承買甚至七八日無一人
交易亦屬不成事體擬請此後到輪之鹽如果鹽色次

劣不合岸銷准運商稟請由瓜棧驗明屬實卽提後鹽
輪售如越輪三次無人承買卽仿照爵閣前督鹽憲曾
批示各垣儻有以醜劣低鹽運棧與樣不符之例尖鹽
低次者降爲和鹽和鹽低次者卽將該鹽全數充公場
官記過以爲不慎鹽色者戒再全數充公係爵閣前督
憲曾批示棧章嗣後又經程道會司詳定尖鹽低次者
降爲和鹽和鹽低次者發還另重一則往返水腳倍於
鹽價且此鹽發回更無出路於場商旣多不便運商亦
難守候換到高鹽再行圓載其中滯礙甚多應請將前
詳此條永遠刪除仍仿遵爵閣前督憲曾批示尖鹽低

次者降爲和鹽和鹽低次者全數充公永爲定章較覺直截了當又稟接到江西督銷局徐道來函言六月以來銷數甫有起色乃昨接吳城分局來函以新到引鹽竟有鹽色低壞形同黑泥者殊堪詫異淮價昂於鄰私所恃以蔽私者全在鹽色之好大局攸關不可不防其漸查水販本小利微斷不能迫售壞鹽致令裹足運商充裕者亦少停輪待售亦必困於輪轉云云並詢及發回另重一條以爲運商有憚於守候而不敢挑鹽色者是低次之鹽挨輪售賣必當稍爲變通另重之條實於運商不便經鹽政馬新貽批查新興爲泰屬向產上色

場分乃該場垣商竟敢重運醜劣低鹽致運商停買七八日之久實屬可惡雖經鄂商搭配分運仰仍移會運司將該場員記大過二次并將垣商嚴加申飭以儆將來嗣後到棧之鹽准如所稟尖鹽低次者降爲和鹽和鹽低次者全數充公其發還另重一層旣多窒礙應卽刪除可也

同治八年十月通州分司陳照擬整頓鹽色簡明章程六條一淋鹵須加澄工也查鹵色不清成鹽卽難潔白嗣後須添開池井遞相淘汰鹵氣多澄一次鹽色可加潔一分所用皂筴去淨皮渣不得雜以碎殼庶鹽無黑

點無論池井儲滷時均用蓆片遮蓋周密使泥沙不致
颺入蓄積經時滷益瑩澈方許入鰱不准隨淋隨煎果
能多澄數次收鹽純白於桶價外酌賞澄工錢文由場
核議如淋滷不能澄清致鹽色溜黑立提頭長煎丁重
究 一煎鹽宜嚴火候也查煎丁圖省草薪火候不足
成鹽卽非上色滷耗亦重嗣後須加草煎熬必須十分
火候並於起鰱時加以溫滷則色愈潔責成竈長辨驗
務期質老潔白不准省草率爾起鰱違者竈長煎丁一
併嚴究 一竈舍須資打埽也查竈舍爲煎鹽之地須
多備長短條帚上埽烟煤下清塵垢不得散落鹽中煎

鹽約有一車之數卽行送垣或逢陰雨鹽暫存竈亦須用蓆片遮蓋又竈鹽上車概用稻草簾覆護使沿途泥沙不致括捲颺入違者頭長煎丁車戶分提究治一收堆必清垣地也嗣後垣商過桶上堆先於垣地多鋪石灰並加蓆片庶入垣之鹽不沾泥土至腳鹽剔出另堆不上正廩再於鹽廩四圍開溝加深以期上堆後洶涵淨盡一提尖尤須多備也查湘鄂須運尖鹽場商於收鹽時剔盡提尖另堆存儲所有次鹽不得顆粒羈入如所產本係尖鹽竈丁敢以和鹽交垣者嚴行究治果能認真講求使鹽色一律潔白由場飭商酌量賞給

一配重宜嚴查察也嗣後垣商重鹽場員必親自赴垣查驗督重則配運不致涸滑儻場員不親赴查驗或因尖鹽不敷以和次等鹽及溜黑之鹽羈和在包者定章綦嚴隨時詳辦經鹽政馬新貽批准飭辦

同治九年三月皖岸督銷局道員勒方錡稟據安慶分局稟稱二月中旬輪銷之鹽如商販利義生允大林記等數票鹽色皆極黑污水販望而生畏退阻不前除分成搭銷外嗣後此等黑污之鹽懇請設法諭禁等因據此伏查運商貪圖減價購買低鹽節經出示嚴禁在案茲復轉詢大通各商據稱新章繳價後持單買鹽係由瓜

棧牌示輪買鹽色高低價值多寡該商等不能自主並非有心取巧其黑污之鹽多係各場餘贍腳鹽等語因思水販買鹽價值並無增減其於黑污之鹽踟躕不買自然之理惟有稟請憲台行知瓜棧嚴飭場商嗣後鹽色一律認真凡餘贍腳鹽不准發售則運商無所取巧水販亦不至受虧於鹺綱不無裨益經鹽政馬新貽批允又據瓜棧薛書常稟查卑棧輪章因去秋新興場鹽低黑各運商觀望不前以致停交七八日曾經職道稟請以後到輪之鹽由運商先行察看鹽色如低黑不合銷路准其越輪派買其場商低黑之鹽如越輪三次無

人承買卽分別遞降充公並將場官記過以示懲戒是鹽雖輪派如遇低黑之鹽原准越輪派買乃稟定新章以後該商等仍不免觀望職道卽爲詫異細詢其故或言運商一經挑揀則場官卽恐記過運商懼得罪場官是以不肯挑揀此等情形雖未必盡確但場鹽係堆存瓜棧運商則多住揚州輪買之鹽恃運鹽抵岸挨輪總可售賣故往往不來瓜棧察看遽行訂交如日前鄂商大德等所買李堡公生和等垣鹽至過掣時始知鹽中羈雜泥塊稟請退還改派經職道委員查驗據稱鹽色尙好惟每包中有棗子大小泥塊一斤半斤不等當批

以該商於輪買之鹽並不先看鹽色已屬不是所請改
派著不准行其鹽色既好著嚴飭公生和將攪雜泥塊
剔揀乾淨照舊過掣至公生和等垣當此整頓鹽色之
時仍敢攪雜泥塊致礙銷路殊屬可恨已極雖未照例
查鹽充公應咨請運司將場官垣商嚴加申飭以儆將
來經鹽政馬新貽批查瓜棧爲場運各商總匯之區整
頓鹽色自應於棧鹽到輪時認真講求方爲正本清源
辦法茲據稟運商輪買時並未察看鹽色實太疏忽該
道擬再嚴切示諭飭令運商看定鹽色再行訂立交單
自是正辦惟所議運商於過掣時及到岸後始行查出

者由督銷局分別罰令歸入本綱輪尾及提鹽歸公等語殊多窒礙蓋鹽色低劣其咎在場商而不在運商今嚴以繩運商而反寬以律場商無論代人受過不足折服運商之心且遵章完課之鹽到岸後罰令壓輪充公於政體商情均非所宜此兩層應毋庸議核前次稟准低次場鹽分別遞降充公章程果能照此嚴辦一二人當知儆懼此後棧鹽到輪應由該道隨時認真查驗如有低黑不合銷路及羈雜泥沙等弊不必再待運商稟請卽驗明鹽樣照章分別嚴辦以期直捷而示懲儆至運商任意買運低鹽於岸銷大有關礙該道稟內所請

酌量核減售價一層候札飭各督銷局妥議詳奪

同治九年四月皖岸督銷局道員勒方錡詳議酌減售價
一層查該運商等既准先行查看鹽色猶復買運低鹽
非惟疏忽之咎難辭亦恐有短價售交之弊似宜酌核
減價以示懲儆而杜效尤且免水販因此項低鹽價值
相同以致觀望不前有礙銷市又湖北督銷局道員程
桓生等詳查卑局售鹽章程向以真梁正梁頂梁分爲
三色按六百斤一引挨輪派售真梁每引售庫平寶銀
十九兩八錢正梁每引售庫平寶銀十九兩五錢六分
頂梁每引售庫平寶銀十九兩二錢如派賣時查驗鹽

色低潮分別遞降以真梁改降正梁正梁改降頂梁如
頂梁色次卽行罰停另開後檔濟銷所有罰停之鹽仍
准作爲殘檔聽憑水販減價領買歷經照辦在案又江
西督銷局道員徐志導稟查運商親至瓜棧者固少卽
商夥亦多性耽安逸顚預從事是以往往受朦運黑污
之鹽到岸西岸輪售向係五稱並開遇有黑污之鹽水
販不要者卽不相強另開下號以廣招徠其黑污之鹽
任聽水販願要者方爲過稱該商夥亦知水販本小利
微受虧不起往往時至十日半月無人過問卽暗中津
貼水販斤重視鹽色爲多少有每包津貼至五六斤者

職道因與輪章無礙而運商業經受虧可懲其顛預之咎是以相沿未改若運引中有驛雜石膏及爲船戶以燒包抵換者立時眼同商夥沈之於河以爲漫不經心者戒相安已久似可仍舊辦理毋庸改議又湖南督銷局道員譚鍾麟等詳查湘岸距淮最遠船戶沿途盜賣驛和亦所時有雖應責成運商盡心照料然長途挽運船戶暗中舞弊亦屬難防若不分別責令船戶賠償轉恐易滋流弊尙不足以服運商之心擬請嗣後鹽船到岸按船查驗如全船鹽色本黑白係運商貪圖便宜輪買時未經挑揀應卽減其售價以免滯銷儻係船戶頂

換驛和一經訊明確實所減之價應責令船戶賠償如
此明定章程庶運商與船戶皆知儆懼在運商買鹽必
思慎爲揀擇在船戶承運亦必不肯稍涉顛預其於棧
中整頓鹽色與各岸疏通銷路均有裨益經鹽政馬新
貽批到岸低鹽據議分別查驗尙屬允協惟所減之價
究應核減若干仰候臨時驗明鹽色妥議詳報

同治十年十月運司方濬頤稟陳整頓鹽色章程八條
一鹽以滷爲本滷清則色潔色潔則味鮮查眞梁正梁
等場分滷井皆係土池泥沙混雜以致色不潔白味不
鮮厚應令場官轉飭場商甞戶將土井改砌磚井深約

五六尺俾可澄滷每竈發給席布口袋一箇於起煎時令竈丁將已經澄清之滷用袋濾過方准入鏊起煎其點鹽之皂角亦須裝以布袋凡有滷井均要蓋苫掩扉以禦風沙現請先就眞梁正梁場分辨起俟有成效再將提尖場分一律推廣一竈舍終年煎鹽煙煤存積甚厚竈戶從不打埽起煎之時聽其墜入鏊中卽上色之鹽亦多變爲黑次應令場商每竈發給竹梢筓帚責成竈頭長隨時打埽潔淨不使飛灰混入鏊內似亦講求鹽色之一助也一場竈煎成之鹽類隔數日運送商垣一次平時堆積竈旁無物遮蓋海濱風大塵沙灰

土率多吹入鹽堆且鹽在土上泥沙尤易沾染色卽因之不淨應令場官督飭商竈於竈旁堆鹽之處鋪砌甎片鹽上蓋以草蓆以免黑溜 一竈戶運鹽入垣散裝車上沿途塵土沙灰堆積甚厚拌入鹽內亦易減色應令場商置備蘆蓆發給竈戶收領於運鹽入垣時卽蓋在鹽上以遮風塵 一各場垣收鹽捆鹽之處皆是土地下腳泥鹽仍埽堆廩上近來鹽色花雜未始不由於此應飭各場官於收鹽重鹽時務須親赴垣內嚴督垣商多鋪蘆蓆不准將鹽再堆地上其蓆上腳鹽亦不准歸併大廩祇准另立小堆積有成數作爲和鹽運售

一各場商垣除本係己產不計外其餘租辦之商准將所購甄料等項用款開具實數報明分司場官衙門存案卽在桶租內分期攤扣以昭公允如現辦之商資本缺乏實無餘力辦理鋪甄等事應請酌量借給官款俾資經理俟新鹽到棧出售時卽由總局按引扣繳歸款一新收之鹽另立一廩於旬報內註明新收字樣不准併入舊堆致滋淆混俟積有成數先將樣鹽呈驗如果實係潔白再發重照捆重一鋪砌甄井等事必須定以限期方能迅速從事第場分既有大小則限期亦應量爲區別如眞梁之呂四餘東餘西金沙豐利正梁

之石港廟灣枋茶正場等場限以六箇月其正梁之掘
港草堰新興等場限以十箇月若於限內一律報竣所
改鹽色潔淨著有成效者場官存記大功酌調優缺真
梁場商重出新鹽准其提前銷售惟查真梁額產每年
僅止三四萬引儻岸銷通暢誠恐不敷配運正梁場分
之鹽果能認真講求鹽色潔白擬請歸入真梁辦理以
示鼓勵儻或陽奉陰違虛應故事卽將場官撤任場商
提案重懲經鹽政曾國藩批整頓鹽色爲目前最要之
務經該司督飭總局議章八條辦法業已詳盡收效之
遲速全視奉行之勤惰各場員果能督率場商照章講

求場務斷無不起色之理所謂有治法貴有治人仰卽通飭實力遵辦並隨時嚴加考核分別勸懲藉資振作光緒二年五月鹽政沈葆楨札照得餘呂眞梁向爲南鹽之冠鄂湘兩岸皆爭求前項眞梁濟銷該場垣鹽儘產儘重不入派照之例鹽價亦較他場獨昂所以體恤周至者原冀產收日旺鹽色足以敵川乃近來該兩場垣鹽愈趨愈下質旣弱嫩色亦花雜滷耗尤多鄂湘水販棄之不顧且以爲不如頂梁查核厯年產數餘東場則同治十三年光緒元年均缺一萬數千桶呂四場則自同治九年起厯年缺一二萬桶不等該場垣獲利最厚

何以亭繳依然而產數轉形其短其走私耶抑商疲耶
場員平日昏瞶糊塗於公事漫不經心可概見矣該兩
場之鹽目前運商嘖有煩言屢請少派應卽停重六箇
月免致以新鹽滷重藉口仍責成該場員督飭垣商照
常收鹽加意整頓期滿後將樣鹽封固稟候驗明如能
規復舊時鹽色產收不致短絀方准開重否則定將場
員撤參場商革除其停重期內鄂湘須運真梁應飭查
場之段隴兩道於正頂場分清出老堆內擇尤爲乾潔
之鹽准其酌數提重作抵餘呂兩場向來月運之數以
爲講求鹽質者勸旋經餘東場大使章文慶稟稱卑場

鹽色尙稱潔白與呂四場列入眞梁儘產儘重卑職深知鹽色爲敵川要務疊經督商實力講求在前數年運商尙無煩言祇因近年來新收之鹽未能在堆除盡滷氣而鹽花含滷鹽質不免弱嫩鹽色卽難乾潔此卑場鹽不能如前純白實由新鹽滷重所致今蒙憲台飭商停重六箇月使運商不致以滷重藉口誠爲因時制宜之善策卑場產鹽係屬商置亭鏹招丁辦煎其每年產鹽盈絀固恃人力尤賴天時同治十三年及光緒元年分奈因雨暘不時產鹽不無短絀卑場儘產儘重場商多收一引之鹽卽多得一引之利平日求其多收而不

得何肯膜視產數更不敢有漏私情弊至整頓鹽色爲
目前第一要義卑職自當嚴飭竈丁於煎鹽時將竈屋
勤加打掃不使有灰塵颺入鍬內其運鹽入垣時已飭
垣商置備油布百餘張飭令車戶遮蓋鹽車之上在垣
量桶時並令垣商多鋪蘆蓆貼地務使沙灰泥土不得
吹入鹽內鹽色自可純潔卑職仍督飭垣商分頭查察
如有竈丁車戶玩違不遵卽當分別責儆勤者量予給
賞以示勸懲經鹽政沈葆楨批該場鹽色日壞固由新
鹽滷重亦由該大使平時漫不經意遂致上色一壞至
此旣據嚴飭商竈於煎鹽運鹽時逐加整頓必須由該

大使隨時親驗方收實效至停重期內尤須責成各商照常收鹽儻有惰誤並將來鹽色仍前低次定將該大使嚴參仰淮運司轉飭遵照

光緒二年六月前江西糧道段起等稟陳變通章程一少提尖以重鹽色也通泰二十場舊章除呂四餘東餘西石港豐利金沙鹽係全尖東臺何垛梁垛安豐富安鹽係全和皆勿用提尖外其餘各場鹽皆有尖有和故有提尖之說何謂提尖二字如於眾人中拔其尤耳今周歷各場親詣煎舍知此二字於場分有可通者有不可通者卽原定鹽色場分之高下亦有不畫一者如掘港

耕茶丁谿伍祐等場鹽色有高有下當提其最上之鹽以合岸銷此提尖二字之可通者也如草堰新興廟灣角斜等場雖色有高下而在竈全係尖鹽到垣後踐踏之餘鹽及碱片之泥沙以尖鹽和之名爲和鹽此乃尖中分和提尖二字不可通者也又如耕茶之李堡向亦提尖雖鹽質尙堅而其色甚次泰屬之劉莊亦列提尖而產鹽甚微多買自鄰場通屬之金沙向列全尖而產鹽無多大半取給於掘港此原定鹽色之不能畫一者也提尖分數本有定章近年商人以收鹽則桶價一例售鹽則牌價較高紛紛提尖漫無限制職道際雲初到

儀棧查明溢數曾嚴加申飭初尙就我範圍後又故態復萌今查各場和鹽色甚不一有竟不亞尖鹽者有十分黑次者必須將提尖場分之鹽嚴加考核尖鹽低次者卽行降和和鹽黑次者卽行扣除而鹽色素好之場竈戶加意於煎垣商加意於收毋以垣場地皮爲取之不盡之寶則鹽色庶乎純淨矣經鹽政沈葆楨批提尖分數向有定章應卽由棧嚴加稽核儻有低次分別遞降

光緒二年七月鹽政沈葆楨札照得餘呂二場眞梁前因質嫩色雜札飭停重六箇月期滿後如能規復舊時鹽

色方准開重並令該道等於正頂場分清出老堆內擇
尤爲乾潔之鹽作抵該兩場向來月運之數在案茲該
道等呈驗各場鹽樣餘西豐利及新興之上岡鹽色堆
老而潔尙堪作抵合行札飭卽以餘呂二場月運數目
均勻攤派給重具報

光緒三年正月瓜棧龐際雲詳查餘呂二場眞梁鹽色向
稱純潔祇因儘產儘重新鹽質嫩溷重以致各商嘖有
煩言上年五月特飭停重迄今半載有餘該管商等頗
知儆懼此次據送鹽樣查驗尙合岸銷當此春產湧旺
需款待收係屬實情現計停重早已期滿所有送到樣

鹽是否卽准其照章給重恭候批示經鹽政沈葆楨批
據送鹽樣尙屬乾潔而呂四尤佳果照此色運岸水販
自必爭買所慮者船戶一經驛和便與原樣不符前飭
運司會棧妥議嚴禁驛和之法仰卽趕速議詳其餘呂
停重各垣准其照章開重鹽色好醜難逃公論垣商竈
戶命脈所在場官考成所在均須協力同心以圖報
國切勿因已准開重轉圖利己而於敵川大局絕不過問
也

光緒三年二月運司歐陽正埔瓜棧龐際雲會詳據淮南
總局稟稱江船驛和泥沙實爲岸務之害現在專運老

堆滷淨色白堪以敵川若不嚴定江船裝運章程未免使場商受不白之冤嗣後江船圓載後應令查艙委員取具江船戶裝運引鹽均係乾潔不敢羈和泥沙切結到岸之後如經督銷局查出情弊立予嚴辦並將船戶花名移知總棧永遠不准裝運惟引鹽在岸發販之時難保行戶無羈灌情事應由各岸督銷局定章嚴禁以保鹽色等情前來本司職道等伏查棧鹽到岸竟至變色直不可解從前立棧定章運商須親到棧按輪驗明鹽色始行訂交近日多不遵照在棧默無一語到岸嘖有煩言其實開江之鹽皆商夥驗明訂交之鹽開江以

後棧中無從稽核嗣後仍照曾文正公定章在棧看明
鹽色再行訂交護照之上由運商加用本商驗訖圖記
以專責成惟該局員等恐引鹽在岸發販行戶有屨灌
情事此弊誠所難免應由本司職道咨商各督銷局酌
核嚴禁經鹽政沈葆楨批允

光緒三年三月瓜棧龐際雲申據淮南總局稟據餘呂場
商張恒泰等呈稱餘呂眞梁爲淮鹽之冠配運湘鄂有
年商等現在公同集議以所收新鹽旋收旋重誠恐瀟
氣不透運商藉口擬各多措資本儘產儘收分月堆積
以在堆六箇月請照重鹽如正月之鹽七月請重二月

之鹽八月請重以次按月遞請似此請定限制重鹽到
棧濟售已將一年滷氣耗盡質堅色白庶足以敵川鹽
而利淮銷等情據此查該商等所稟分月堆積以在堆
六箇月請照重運係爲力求鹽色乾潔起見自應准如
所議以後卑局給發該二場重照總以在堆扣足六箇
月爲限於捆重時仍責成該場員驗明不致以新代陳
庶足以昭核實等情前來相應申報查考

光緒三年六月泰屬場商吉同順等稟竊商等承辦東何
安富丁谿伍祐等場或係全和或係和多尖少現奉鈞
批無分尖和先儘老堆重運極老重竣再重次老次老

重竣遞重先收之新鹽等因奉此商等理應懷遵曷敢
再瀆惟尖和情形稍有區別請爲我大憲陳之查尖鹽
額產三十餘萬引每年湘鄂可銷二十二三萬引是銷
數可七折外也和鹽額產二十四五萬引每年除食岸
指重三四萬引外春秋兩次派照十萬引是銷數僅五
折外也況查尖鹽存堆約四十餘萬引約計兩年即可
全銷丁丑春收之鹽已卯之春已可輪售和鹽則存棧
約七八萬引存堆三十餘萬引非三年不能售竣丁花
春收之鹽必庚辰方能照派辛巳方能挨售此尖和之
銷數本不相同也目下楚鹽引地已可收復尖鹽場分

皆有訢訢向榮之意和鹽則舍十三四萬之銷路別無指望歷來附辦之商大率零星湊集多者不過三五千引從無包定年限者蓋因銷售必在三四年以後誰肯以盈千鉅萬之資甘爲佔擱存鹽之積壓如此附商之觀望又如此商等力竭計窮不得不據實上陳仰乞憲恩量予變通以維全局至產數與銷數本太懸殊欲爲正本清源之法非於江皖二省開拓銷路終無善策江省患在鄰私則減價以敵之昔年分定粵界及津貼饒鹽等岸可循也皖省患在散漫則專岸以整之昔年中路綱食與江運八岸等岸可考也商等仰望情殷謹附

上陳經鹽政沈葆楨批先儘老堆者何重鹽色也曷爲
重鹽色拓銷路也同一堆鹽而何厚於老堆堆老則積
年更久占本更甚也尖和場分情形不同今不稍加區
別何也水販願買滷輕色潔之鹽鄂湘與西皖無二致
也新商宜招此則迹近於阻者何新商類皆舊商之花
名卽另有新商要均之商也有便宜者卽有喫虧者便
宜者數人喫虧者大眾便宜者目前喫虧者永遠卽有
零星湊集之戶無裨大局也竈戶以鹽爲生無商收鹽
奈何老堆售出之價責令源源接收固無礙於竈也曷
爲不分成搭售使新商有所挹注蓋一通融而新商混

淆捷足者便有巧可取鹽色仍不能整齊也然則爲新
商者將如之何今日之新堆卽他日之老堆惟有此同
心協力恪守挨年遞運章程則鹽色日潔鄰私可敵岸
銷可暢岸銷暢場困自蘇否則卽減售價立專岸而鹽
色低次民不願食無益也該場商之斷斷與本部堂爭
者意謂重老堆則滷耗垣受之重新堆則滷耗販受之
此爲經紀錦囊中不可明言之秘如腐儒之執迷不悟
何果爾必場商智而水販皆愚則可也端木子終身行
一恕字是以億則屢中貨殖傳云貪賈三之廉賈五之
該場商等反覆取譬腐儒所見或有未可厚非者耶仰

淮運司轉飭遵照

兩淮鹽法志卷三十三

兩淮鹽法志卷三十四

場竈門

鹽色

下

淮南鹽色下

光緒三年九月鹽政沈葆楨札司棧督銷局照得恢復引地欲敵川私以講求鹽色爲第一要義新章先重老堆使鹽質久乾溷輕耗少立法已極苦心惟其中若原雜沙泥雖多歷年所仍不潔淨夫鹽色之不齊說者皆以各場地有厚薄之分卽鹽有高下之別殊不知海濱廣斥自古爲然淮南場竈甲於天下豈舍餘呂別無上色

欽見據泰分司許運判講求煎煉先取泰屬最下之東
何兩場原涵用灰重淋一次其清如水入鍬試煎成鹽
竟能潔白猶恐偶然之事未足爲憑復提十一場上中
下各亭之涵眼同過灰煎鍊呈驗鹽樣一律色潔如霜
無分尖和場分始信地氣之說未必盡然特人力不齊
過灰有淨有不淨耳且照此煎鍊所加成本每包約七
八十文卽敷人工席片之用每斤貴不足一文而鹽食
迴殊岸民不以食貴爲慮運商尤以爭買爲先惟棧中
牌價定章祇論場分尖鹽色雖惡而價昂和鹽色雖美
而價賤黑白混淆相沿日久以致場運兩商皆視鹽色

爲無足重輕愈趨愈下亟須力圖挽救嗣後應令通泰
二十場仿照泰分司試煎之法先將原洶重淋必使澄
清再行入鍬煎成自然潔白另堆存儲加用蘆席遮蓋
於旬報內另開一摺專報重淋新堆將來此項新鹽開
重先備五等包色一眞梁一正梁一頂梁一降頂一和
鹽各置一器以爲標準訂交之時場商運商公同閱看
如果白如眞梁卽照眞梁牌價再次者遞降而下雖向
爲上色場分而此時黑次卽以和鹽論下色場分而此
時潔白卽以尖鹽論隨時升降不重虛名而求實際凡
重運場鹽該管分司先以五等鹽色比較定爲何等備

文申報儀棧臨售時再由棧中督同場運商照色覈對定價如此則運商既可高下在心收交易覈實之效而場商欲求善價自必多收上色之鹽各督銷局於售鹽之時不論場分而專論鹽色水販固所樂從運商尤必多派親信之人稽查江船以杜灑賣驛和之弊

光緒四年六月運司歐陽正墉儀棧道員徐文達詳奉憲札飭令通泰二十場仿照泰分司試煎之法一律試辦重淋等因本司道等當飭通泰兩分司遵照辦理在案嗣據泰分司許運判稟稱各場試辦重淋過灰瀝溷舟車運送遮蓋蘆席等項工本加增請將此項重淋之鹽

酌定畫一牌價俾各商有所遵循前來並據稱調齊泰
屬十一場之鹽並通屬餘呂真梁及正梁之鹽互相校
定分爲真正頂和各用木匣裝儲書明某等鹽色另備
何垛東臺兩場重淋鹽各一包其色直逼真梁以備比
較至於呂四餘東真梁鹽色最上該兩場自無須重淋
此後他場重淋雖有過於真梁者亦不得於真梁價外
另有增添以昭限制而免運商藉口再查重淋鹽色雖
未能一律真梁縱次不過正梁頂梁而止可以必無和
鹽設遇運棧鹽色在可上可下之間場商運商互有爭
執者應作降一等論價庶煎辦重淋者力圖向上不致

日趨於下矣等情本司道等伏查重淋之法能將下色場鹽盡臻上色實爲淮鹺一大轉機擬請卽照呂四真梁定價每包售錢一千七十七文以示鼓勵其有過於真梁者亦不得於價外別有增添或有色質較遜之處卽按真正頂各色以次遞降經鹽政沈葆楨批旣據送呈重淋鹽樣與真梁無異自應卽照真梁定價將來鹽運到棧仍由棧委親加比較或有色質較遜之處卽按真正頂各色以次遞降則價之低昂必以鹽之高下爲准各垣商務當爭自濯磨力圖上色以收敵川之效仰卽通飭遵辦

光緒四年九月運司歐陽正墉儀棧徐文達呈據通分司
陳運判稟稱通屬九場如呂四餘東素產真梁色質爲
冠餘西金沙石港豐利等場滷氣本清產鹽係屬全尖
惟枰茶角斜掘港三場向有和鹽應卽仿辦重淋以冀
漸臻上色茲於角斜場選得近海滷厚之亭二十四副
飭據各商公同議定先行認收五百引擇於八月初五
日開收又於枰茶場選得滷足鍬整亭場六副據枰茶
正場商人先行認辦三百引擇於八月初七日試煎卽
於八月上旬開收專報至李堡各垣見因租商新舊交
替容俟新商奉准開收卽當催令遵辦並各呈鹽樣商

結前來卑職查驗呈到鹽樣色質潔白逐加比較似不
亞於餘呂眞梁惟認收引數尙屬無多見當創辦之始
應令先將所認鹽數講求淋煎必須一律純潔務使和
鹽下色悉臻上色經鹽政沈葆楨批據呈枰角兩場重
淋鹽樣一律純白與許運判前呈泰屬各場重淋之鹽
其色相埒足見海濱廣斥涵質本澄前次緇黑之由皆
人工未修耳見在各場試辦重淋著有成效仰卽激勵
各該員漸推漸廣其有重淋較多尤爲出力之員由司
查明於年終詳請外獎其惰誤者隨時督責懲儆庶幾
將來運赴鄂省藉可蔽川方不負本部堂一番整頓苦

心也

光緒四年十月運司歐陽正塘申據泰分司詳稱泰屬每年約共產鹽三十餘萬引所有碱片不止一成因口岸銷數無多故一成之外往往屨入和鹽堆內而竈戶亦復不甚愛惜茲奉札飭碱鹽既合西岸銷市如能多配引數藉敵閩私自是千載難逢之機會已飭場督率商竈於煎鹽將成時多加火候用意煎鍊務使碱片加厚盡數入垣不任稍有拋棄走漏每年酌中約可收碱鹽一成三四釐之數是向祇三萬引者當可多收萬引卽此類推通屬每年約產鹽十萬引亦可多收數千引通

泰兩屬合計每年約共多收碱片一萬餘引此後各場
摺報請准其報收碱片一成三釐之數又據通分司稟
稱卑屬九場內除呂四餘東兩場係屬真梁場分又餘
西金沙石港豐利四場鹽質輕鬆鹽色均係全尖向無
出產碱片以上六場應請毋庸置議惟枰茶角斜掘港
三場歷來報收碱鹽核計該三場額產鹽三十九萬七
千五百三十六桶以每年所產碱鹽多寡牽算約計一
成合鹽一萬一千五百餘引等情前來理合報明查考
光緒五年二月鹽政沈葆楨札司棧據江西督銷局張道
銘堅稟稱竊謂煎鹽猶煮飯然其碱片卽鍋底之焦飯

也飯熟卽起鑊底焦飯必薄而少若果稍待須臾自厚而多以彼例此事雖各別理實相同故碱片亦曰鍋巴鹽也似未始不可加煎第碱片質堅而重一桶碱片較之一桶梁鹽其重輕實有不同查儀棧牌價碱鹽較貴於梁而場商收鹽桶價並無所加故竈戶多有不願此議加三釐之說並未實收到堆之所由來也因思岸銷衰旺原無實在把握然就見在西岸情形而論似又不能不預爲籌備等情合飭設法籌辦加煎

光緒六年六月儀棧道員徐文達詳上年三月鄂岸開辦乙亥秋綱查照是年春單發重引數核實釐定鄂岸每

票五百引派買真梁八十引重淋七十引正梁五十引
頂梁三百引湘岸仍照舊章每票派買真正各五十引
頂梁四百引均經詳奉批准照辦在案查湘岸派數前
無重淋係因試辦之初產收未旺又值鄂岸急須多配
上色是以暫未議派見在重淋產數日增銷數亦廣擬
請將湘岸每票暫配重淋五十引如將來岸銷通暢隨
時酌加所配重淋運數卽在正頂數內縮除每票改派
正梁四十引頂梁三百六十引核於籌銷之中仍遇順
商之意似尙允洽經鹽政吳元炳批允

光緒七年四月儀棧道員徐文達稟本年各岸過鹽見已

掣有十餘萬引河水通暢鹽艘可以暢運惟重淋場鹽
鄂商總不願多配此項尖鹽在初議配銷之時前憲本
飭儘數派售職道以其時重淋場產爲數無多恐占壓
別項場鹽銷數僅議每票搭運七十引而湘岸則每票
祇派重淋五十引先後詳奉批准乃自去夏以來屢據
各商稟請減派謂重淋不便於銷曾奉前署憲嚴批駁
斥而職道與湖北督銷局程道每接商稟往復函商咸
以近年重淋產收已廣各場存堆較前增至數倍驟欲
議減恐於場情未協查岸商之所以藉口動稱重淋滷
重場鹽優劣不外色質兩端重淋鹽色等於真梁無可

訾議所慮者涵重而質嫩耳是以職道於上年在署運
司任內督飭通泰兩分司悉心籌議於定章存堆半年
之外復將秋冬所收重淋存俟經過霉伏概於次年七
月以後再行給照派重近准鄂局來咨仍稱岸商以重
淋運多銷少商請酌定產重限制場岸相爲表裏岸商
既以重淋爲苦何必不量予變通但各場重淋變下色
爲上乘累年講求而成又未便輕率減運致場本占攔
良規中廢經鹽政劉坤一批重淋自沈前部堂創辦煞
費經營始收成效將來規復引地非此不能敵川雖牌
價稍昂涵耗稍重運商自宜勉力承運以拓銷路惟程

道既屢次咨商且聞不肖場商近有以新鹽驛重情弊
果爾尤不可不嚴加整頓加扣月分一層尤目前要著
並嚴查弊竇據實詳候核辦

光緒七年五月江西督銷局臬司張岳齡稟據西岸運商
怡和義等稟稱商等奉諭次色之鹽頗礙岸銷以後若
運黑鹽到岸籤看卽罰停輪竊思商等在儀棧捆鹽係
照棧示派輪場商運鹽至儀亦係挨輪掛號商等照其
次序派捆若逢黑次之鹽輪至名下既不能刷選更換
又不能另買別場雖因低滯之鹽往往停稱不捆待至
十天半月之後依然棧中分配令捆乃因場鹽業已抵

輪其勢不能不爲之脫售棧中若不派裝誰復甘心堆積實非商人不顧大局甘買黑鹽懇移知運司儀棧以後各場捆運和鹽至儀若過通泰兩壩監掣同知驗掣時設遇黑次鹽色飭其發回重復淋煎不准運至儀棧懸牌輪捆或者黑鹽可淨否則令商等指場選買亦可捆運白色之鹽等情伏查西省雖係和鹽口岸光緒三年奉前憲沈責令各場無論尖和加工重淋務使一律潔白用敵鄰私並飭西局於船鹽抵岸時取樣較驗歷經遵辦在案此舉原爲杜運低鹽以保岸銷起見乃各場總未能實力奉行本年四月閒驗得己卯秋綱同仁

祥春生裕二商抵岸之引內有低黑不堪者又續到之裕大連怡和義等所呈樣引亦皆羈雜不潔該商等意圖價賤羣運低鹽應罰停以示儆戒惟據眾商具稟所辦黑鹽實因場鹽挨輪捆運不能揀選更換似覺情有可原其應如何嚴定章程使場商運商剔除低黑概辦上色白鹽應請飭行司棧迅速會議經鹽政劉坤一札飭司棧照辦

光緒七年六月運司洪汝奎申先准江西督銷局來函以西岸因淮鹽色黑官不敵私票商在淮橫買又謂不能挑選致滯輪銷等語當查淮南棧鹽定章輪售而訂買

之前先由運商閱看鹽色過掣時如有黑次夾雜准其隨時揀剔立法極臻周妥至今仍守成規辦理惟端本澄源要在場員加意講求多盡一分心必多收一分效從前本有視鹽色高下定場員優劣之案考成所繫自可稍知儆惕業經會商儀棧徐道將到儀之鹽何場最好何場最壞隨時較驗擇尤勸懲縱不能以一日之短長爲定而日久月深可知梗概並以和鹽場分歇商清堆之鹽多係積年廩腳色最不齊且有麝雜泥沙者非於捆重時逐細揀剔劣鹽卽夾運出場又尖和並產場分向有提尖惟尖鹽提數過多和鹽成色愈次徐前署

司深恐各商貪尖鹽價高且比和鹽重售較速任意多提冒飭各場力求實在勿任以尖害和見經本司分晰札行通泰兩分司督飭各場員實力經理不得視爲具文

光緒七年七月運司洪汝奎儀棧道員徐文達詳查西岸見行額引除搭運碱片三成外其餘七成概行和鹽本係淮鹺次色與湘鄂例銷尖鹽上色情形不同牌價亦復各別光緒三年創辦重淋鹽色與眞梁拊牌價亦照眞梁核定奉准專銷湘鄂並不運至西岸至棧中售鹽挨輪立法最精未可稍有移易惟剔除低黑一層最爲

整頓鹽色要務查運商買鹽向章先看鹽色如有低次
黑鹽准其退換另買卽已經定售之鹽過掣時驗有低
次亦予隨時剔換辦理固有定章惟每票鹽五百引計
四千包運商選驗鹽色未必能逐包過目棧中每日掣
鹽多至三千餘引爲數至二萬數千包官稱四十架同
時並掣場運稱捆損夫及船戶水手等人數眾多喧闐
龐雜卽使稽查嚴密亦難保無一時之疏岸咨旣以低
黑爲言自應格外講求以重鹽色本司職道公同覈議
除再示諭各商於輪售引鹽時認真揀選鹽色並令刊
刷照單發交揚州分棧於場運訂交之前飭將所驗鹽

樣或係乾潔或有潮黑逐票由運商親自填註先期送
棧乾潔者照章訂售領掣潮黑者立予查扣換買如此
則鹽必經驗驗必填照照必呈核事前既無可抑勒事
後亦有所稽查一面復於隨棧委員中遴選四人逐日
輪流常川駐浦專驗鹽色分別等差核實存記以昭周
密此後各場重鹽到棧並嚴飭各商逐細揀選不准稍
有泥沙羶溷如驗有鹽色低黑除照章由棧停輪扣售
外並隨時封樣咨送本司察驗核辦其鹽色乾潔逾常
者亦咨由本司存記以示懲勸惟引鹽到棧以後驗有
惡劣揀剔已遲且鹽非全數醜壞不堪商本所關亦安

能盡令拋棄故向章遇鹽色或略欠勻潔滷氣或間有未清必令提出篩剔或將好鹽和拌或量予停輪示罰仍俟剔淨拌勻滷氣行盡再行歸輪出售此卽岸咨內稱十天半月以後依然分配令捆者是也近年場鹽自奉前憲沈文肅公定挨年遞重之法堆老質乾鹽色實較從前潔淨今就目下情形所宜整頓和鹽者大要有二一曰清堆各場清堆之鹽多係積年廩腳鹽色最爲不齊非於捆重時逐細剔除其鹽卽不免花雜且鹽至清堆埽數本商多半停收利較錙銖顆粒不肯棄擲妍醜卽因之混淆該商又恃無後鹽續運旣無所畏懼復

不顧聲名凡以劣鹽捆重出場者半係此等歇商尾票
稍不加察卽被朦溷此後應飭各場將清堆之鹽加意
揀剔務須一律勻潔方准出重一曰提尖通泰兩屬除
呂四餘東專產眞梁餘西金沙石港豐利專產正梁係
屬全尖其餘各場率係尖和並產各該場產鹽亭鍼只
有此額尖鹽提數過多和鹽成色愈次此乃一定之理
連年屢飭嚴核提尖分數然尖鹽牌價較高又比和鹽
重售較速各商總未能實力遵辦此後應飭各場將提
尖之鹽慎重稽核勿使因尖害和其餘如澄清池涵埭
除鍼舍芒蓋廩堆精選包索皆於保護鹽色不無裨益

經鹽政劉坤一批允

光緒八年正月鹽政左宗棠札運司見在淮北上色場分所產之鹽爲數有限如果各岸暢銷尙不敷應運之數茲擬概行改用重淋一色爲正本清源之計嗣後改煎各場分所出之鹽務宜乾潔味美通成一律不准以低鹽羈雜及虛報產數希圖速售垣商收鹽務宜逐包加驗不准以埽鹽分灑羈和庶期官鹽暢銷可爲漸復引地張本卽轉飭通泰分司督飭各場員一體遵照趁此春產將屆之時將重淋一項趕緊舉辦

光緒八年四月湖北督銷局道員程桓生呈據鄂岸運商

日陞恆等稟稱重淋鹽自試銷以來歷今兩載銷市見
已大暢每月約在二千引左右真梁被其占擱因而銷
數大減見查存岸真梁有一萬零引存岸重淋僅三千
餘引不敷兩月之銷且刻下倡辦官運指運重淋上色
以敵川私又慮儀棧存鹽不敷派運鄂岸正值旺銷之
際一旦脫檔販情定必疑詫商愚昧之見重淋本係呂
四牌價方今真梁滯銷實因重淋之價較減水販爭趨
致有偏輕偏重之虞擬請將重淋售價改復真梁一律
庶水販無所棄取則重淋可免脫檔真梁不致積滯卽
正梁亦可聽水販指買一轉移間則各色皆可疏通而

商情亦無窒礙等情職道查重淋鹽前因試辦之初恐不合銷於真正頂梁各檔之外另派一檔仿照從前充真梁鹽價比正梁每百斤加銀二分出售每引合銀十八兩四錢八分以廣招徠請俟行銷後查看情形再行稟報各在案見在重淋銷路通暢存岸無多據稟請照真梁牌價一律出售既免真梁積滯亦免重淋脫檔似應准如所請已批飭自本年三月十六日起照真梁價每引售庫平銀十八兩六錢歸於一律

光緒九年二月運司孫翼謀呈奉憲臺批開重淋一項經該署司督飭通泰分司推廣辦理泰屬之東臺何垛草

堰等場每年已可產八萬餘引其餘新興伍祐安豐丁
溪及通屬之角斜枰茶等場皆易整頓仰再分飭趁此
雨暘時若加意講求總期愈推愈廣等因卽經遵批分
飭該分司等查照辦理茲據泰分司稟稱富安場每年
可產重淋約計三四千桶安豐場每年約可產四萬餘
桶丁溪場每年可產三萬七千餘桶廟灣場每年共認
辦六千桶新興場每年約可產二萬引又據通分司稟
稱枰茶角斜二場每年各增產重淋一萬引等情本司
伏查泰屬東何富豐丁草伍新廟九場計十二萬餘引
連同通屬枰角二場統共合計共有十四萬餘引如果

雨暘時若滷足草豐似不致有所短絀其餘別場如能一律推廣改煎重淋再行酌核辦理已批飭該分公司等督場實力講求並考核各該員功過隨時詳辦

光緒十年二月鹽政左宗棠批運司詳重淋改捆一案此項試銷重淋既據該司道等飭局妥議應卽如詳每引改捆十二包到棧時由該道認真掣驗如果斤兩實有多餘卽行割沒入官隨時具報仰候札飭湖北督銷局查照

光緒十一年七月湖北督銷局張銘堅稟竊照荆襄等府運鹽試銷案內稟奉前憲批准每票原配大包重淋一

百引外加配小包重淋五十引專運上游局店以便查驗而杜倒灌卽經遵照辦理嗣因運司儀棧會詳加派鄂岸真梁案內經減配大包重淋二十引各在案茲查荆襄等處本年上半年銷數較滯截至六月底岸存小包重淋七千餘引儻數月內銷數未見大起不無壅滯似宜隨時體察據各商懇請停止小包重淋改配頂梁具稟前來卑局伏查銷市暢滯本無一定惟照目前樊沙等局銷市情形小包重淋緩配一綱尙敷提運擬將庚辰秋綱內每票小包重淋五十引暫行改配頂梁計於場產棧存各數無甚窒礙而於岸銷亦免積滯經鹽

政曾國荃飭司棧詳議

光緒十一年十月署運司程桓生儀棧楊鍾琛詳奉憲臺
札開據湖北督銷局稟小包重淋緩配一綱札飭司棧
秉公會議詳奪飭遵等因署司等遵卽會核辦理聞據
鄂岸運商盧大昌等稟以存岸重淋壅滯請於庚辰秋
辛巳春兩綱內暫將大小包重淋一律停配改配頂梁
俟下次查看岸銷再爲改復等情又據場商謙同順等
稟小包重淋到棧在途約有一綱配數似宜場運兼籌
仍請照舊配運各等情前來均經批飭淮南總局併議
核覆各在案茲據總局委員許寶書等稟稱查重淋配

運之多寡固以岸銷之暢滯爲衡亦須以存棧存場數目之盈絀爲斷見在鄂岸所存小包重淋督銷局文內旣稱截至本年六月底尙有七千餘引不無壅滯自當變通辦理惟查通泰兩屬存堆及已重在途重淋共有十二萬餘引之多又在棧在途小包重淋七千七百餘引若全數緩配一二綱不獨資本久擱亦且耗滷有虧卑職等接見各該商均稱承辦重淋已屬本占利微若再減配實覺苦累難堪復經一再開導始據該商等請每票減二十引復查此項小包重淋存棧存岸同一有關商本自當場運統籌以昭平允且頂梁配運存岸較

多亦屬占攔成本擬請俟庚辰秋綱起每票減配小包三十引以二十引改配頂梁以十引改配餘西真梁似此盈虛酌劑於商情無所偏倚於棧章亦無參差惟重淋既已減配積存又有確數數年之內足敷配運應請分飭見辦重淋場分體察情形應減則減應停則停迅速妥爲辦理具覆等情署司職道伏查創辦重淋本爲拓銷起見乃銷數未能推廣積久益形壅滯自應設法減配惟重淋存數既多多減固非商願停配尤礙場情誠如總局所議頂梁存多亦屬占攔商本似應於酌盈劑虛之中仍寓互相兼籌之意據請自庚辰秋綱起每

票減配小包重淋三十引以二十引改配頂梁以十引改配餘西貢梁察看所議尙屬允洽經鹽政曾國荃批允

光緒十二年五月運司程桓生呈覆據署通分司楊槐稟稱竊通屬試辦重淋祇有枰茶角斜二場前奉飭議卽據枰茶場大使查明重淋亭竈辦無成效請卽一律停止惟角斜場留辦亭場四十餘副飭據角斜場大使稟以留辦重淋亭場時地均不能合宜擬請停止改辦頂梁又據泰分司沈桂稟稱伏查卑屬各場煎辦重淋創自東何繼於草堰本屬久著成效其餘奉飭推廣類皆

遷就誠如憲批難免塞責取巧所有富安安豐丁谿伍
祐新興等五場既係該印委等會查涵氣未宜器具未
齊自應准其暫行停辦以疏積引其東臺何埭選而又
選所存煎辦重淋之竈東臺十三面何埭一百三十面
卑職復加查察實係久著成效之亭自無屢雜之弊應
請准其留辦至草堰場重淋出數最多且器具整齊惟
租附各商皆因轉輸不繼擬請暫停已據該商仁豐益
等稟奉憲臺批准停緩行知遵照其餘自收自運之同
興安洪曲新等見煎重淋之竈一百七十八副既據該
印委勘明器具一律齊全應請准其留辦統計三場留

辦各窰每年約產重淋六萬上下

光緒十二年八月湖北督銷局道員張銘堅等稟鄂岸引鹽向係分色派檔輪售近年重淋配數較多而岸銷究以頂梁爲大宗據司月運商同順亨等稟稱截至本年六月底存岸之鹽頂梁一色僅敷半年銷數而大包重淋眞梁正梁非二三年不能售清而小包重淋尤難以計算仍有庚辰秋未運殘綱六十七八票共計應配大小包重淋眞梁正梁一萬六七千引全數運漢不能周轉辛巳春綱開辦在即擬請停止小包減配上色多配頂梁以合岸銷等情並開列各項存數到局職道查目

前岸存鹽色原屬上色居多以頂梁存售數目核計相距不無懸遠似必須量爲酌劑以利轉運小包重淋一項從庚辰秋綱起業已減至每票二十引嗣准運司咨以淮南局稟據鄂商盧大昌等稟奉飭議場商加貼提運分川界內包索斤兩案內擬將庚辰春秋兩綱小包重淋不提上游統歸漢局輪售並懇再減小包重淋十引等情咨局議復職道當查庚辰春秋兩綱小包重淋統歸漢局輪售尙無甚窒礙第分川界內己卯秋綱小包售竣卽接提辛巳春綱似每票二十引亦不可少當經咨復擬仍照司棧前詳二十引數目辦理應否於開

辦辛巳春綱卽將大包重淋及真正兩色酌量減配加配頂梁若干引以合岸銷其小包重淋究應如何搭配之處乞示祇遵經鹽政曾國荃批飭司棧核議

光緒十二年十月署運司程桓生儀棧道員吳修鼐詳據淮南總局稟稱查上色場分向有專辦之商講求煎鍊成本較增積壓旣多占擱尤重今以鄂岸運商有減配上色之請該場商聚和公等均以重淋及真正兩色存垣極多成本最重俱難減配稟請照舊訂售展緩一綱察看情形再爲扯派等情亦屬不得已之苦衷惟查核湖北督銷局來文內有大包重淋真梁正梁非二三年

不能售清之語則上色之鹽多運赴岸亦屬存摺頂梁
銷市較好存數無多似應因時制宜酌量增減期於岸
銷有裨復核鄂岸每票五百引向章搭運大包重淋八
十引小包重淋二十引真梁一百十引正梁三十五引
頂梁二百五十五引奉飭前因擬請將真梁及大包重
淋各減十五引共三十引卽以頂梁如數加配此外正
梁產數較旺壅積最甚且配數本屬無多應與小包重
淋之二十引均仍其舊毋庸再減是否有當抑應暫緩
一綱再行察辦之處理合遵飭議擬具文詳覆呈祈會
轉再鄂岸辛巳春綱已於八月二十四日開辦各運商

俟定案後再行按照配數訂買新鹽應卽迅賜示悉等情查鄂岸存鹽上色過多改配頂梁一案見據總局議復請將真梁及大包重淋各減十五引加配頂梁三十引似尙可行經鹽政曾國荃批如詳飭遵

光緒十三年正月餘東場商裕盛隆等稟竊商等昨以產多配異獨抱向隅懇恩秉公剖斷以甦積困而保危局各情具稟仰奉鈞批查該場派數早經司棧議詳立案此次真梁每票減配十五引據儀棧報明專減呂四十引餘西五引聲明餘東不能再減是該場產數較多棧中深知而各場銷滯仍復相同見在鄂岸將上色減價

眞梁頗爲疏通但求岸銷得暢則各場皆可支持誠如
總局所議毋庸更章等因商等理應祇遵惟查各場同
因滯銷負累滋深誠如鈞批但求岸銷得暢則皆可以
支持而餘東餘西呂四眞梁場分其間則有差異是其
患固因岸銷之滯而其累實由於產派不均從前眞梁
運引同係儘收儘運挨輪售賣迨至改爲分場派數苦
樂則大不相同前奉棧批餘東以產抵銷祇合七成之
數餘西呂四二場目下雖奉減配每票十五引實則仍
有產不敷銷之慮鄂岸見籌疏銷核減上色之價將來
銷市必見大有起色各場自必同沾利益餘西呂四二

場更當倍獲豐盈計以目下銷數已有產不敷銷之處設在旺銷不識如何措意而商等餘東一場縱使盼到暢旺派數如此仍屬盈虛判若天淵況見在場困委實岌岌難以終日再四籌思因念規復輪章原出自運商之請且此案祇涉真梁場分餘呂三場之事與其餘各場並無出入窒礙爲此再行披瀝直陳經鹽政曾國荃批真梁祇有三場今呂四已於定章之外多減十引餘西多減五引豈能令其再減輪售則該場到棧鹽多自占便宜計產派銷則產數必自虛報即使邀允試問餘西呂四二場能安緘默否從此日啟爭端於場務有何

稗益該商等若再固執鑽營意在必得法律具在懷之
切切

光緒十三年六月通泰場商祥興等稟竊惟淮南各項鹽
色配銷額數向以場產之多寡爲權衡亦視岸銷之暢
滯爲準則立法本極公允商等承辦頂梁場分從前憑
產派銷鄂岸每票五百引內配頂梁四百引自沈文肅
公整頓鹽色提運重淋爲敵川復淮之舉重淋產自頂
梁場分是以所配之數均在頂梁額內撥銷厥後重淋
銷滯配數遞減遺額自宜復還頂梁方爲公允乃近年
重淋配數雖已減爲八十五引而所減之數大半撥入

眞梁正梁數內頂梁見仍僅配二百八十五引以故存數日積日多占擱情形實爲各項鹽色所未有伏查頂梁共產十三場加南洋李堡小海等處見共存場六十餘萬引歷年產多而派少重淋產自頂梁場分見存場六萬餘引並准改降更大半停煎來源已少正梁產金沙石港豐利廟灣四場及上新興等處眞梁產呂四餘東西三場見共存場八萬數千引歷年產少而派多鄂湘兩岸銷各項梁鹽每年約二十萬引頂梁派銷十二萬有奇眞梁正梁派銷共四萬四千餘引重淋派銷亦在二萬七千餘引是頂梁存數占十分中之八分以上

而派數僅得十分中之六分零真正存數祇占十分中之一分有餘而派數乃得十分中之二分以外互相評較優絀顯分且核計頂梁存數五年方能銷竣真正存數派銷不敷二年重淋存數派銷亦不敷三年其遲速則又懸殊並查上新興原列正梁見奉准降歸頂梁乃上新興在正梁內原有之派數則未准撥入頂梁仍由正梁占派是頂梁愈降愈多派銷愈擠愈少而上新興一項忽升忽降其趨避幾不解何因若專爲疏銷正梁而設今湘岸指銷廟灣一場正梁以豐金石三場派銷鄂岸金石兩場一年產不足二千引豐利一年亦祇產

四五千引核其每年派數均恐不敷而上新興本係正梁猶令其讓開小包重淋遺額則起而爭配儻就此定案淮南各場惟正梁獨強何妨將上新興仍作正梁湘鄂通酌以補豐利廟灣派銷之不足商等積困難支非賴派數持平不足以計產收而扶生計況以鄂岸銷市而論頂梁質老味重最合岸銷水販貪購見存岸僅一萬四千餘引重淋質鬆味淡除提襄樊各局外岸銷有限見存大小包重淋共二萬一千餘引並以小包重淋在岸降作頂梁出售真梁正梁存岸見有一萬二三千引銷市亦滯若不變通加配頂梁轉瞬且有脫檔之虞

叩恩飭將小包重淋遺額二十引撥歸頂梁配銷以上
新興之鹽仍歸入正梁並查核各項存數增減派數則
項梁應派至十分中之八分以上而正梁真梁只應派
十分中之一分有餘重淋應派不到一分庶於憑產派
銷之義略得其平而岸銷亦無虞脫誤經鹽政曾國荃
批此項小包重淋不敷配運自應以大包重淋抵補爲
正辦業據重淋場商鄂岸運商具稟均經批飭運司會
棧速詳定案將來仍以大包重淋補其不足最爲公允
該商等值此鄰私充斥均宜講求鹽色疏通銷路和衷
共濟其保藩籬勿沾沾於配數計較轉致誤運是爲至

要

光緒十三年十月鄂岸運商泰宜茂等稟查鄂岸每綱計一百五十票見開綱已閱半年僅領還咨六十餘票遵章辦運此外悉爲重淋未售咨文壓擱以致欲運無由並查正頂梁鹽業已輪銷至辛巳春綱而重淋則庚辰綱之鹽尙多堆積在岸是其銷市之滯確有明徵全綱課釐因一重淋而擱誤運商開綱轉運因一重淋而牽累卽各場梁鹽行銷亦因一重淋而遷延伏思重淋之設本爲敵川起見今川不能敵反以病淮幾至場運各商交受此累所以前次鄂局憲有減產減運來文卽前

運司亦有飭場停煎之札見聞各場皆遵飭截止惟草堰東何等場尙未遵停蓋由重淋牌價貴同呂四在場提收每桶僅加數十文到棧銷售每引照正項價值加至七八百文不等甚至卽以頂梁捏充一鹽兩售該商等獲利甚厚而通岸貽害滋多目前下綱咨文已到有三十餘票因本綱尙有八十餘票爲重淋掛住環咨不獲轉運致阻下綱不能接開若不先行籌計恐有一誤再誤之虞今重淋旣尙有此名色固不能不配而鹽色必求合岸銷應請核減大半並懇通飭一律停煎以免無益銷路而有損運務推原其弊實因重淋質輕味淡

價高涵重水販不能強食戶之必買卽岸局亦不能強水販以所難此皆滯銷之實情也經鹽政曾國荃批重淋不能敵川反以病淮二語尤爲確中時弊旣經前署運司飭停場煎祇草堰東何等場尙未遵停自應由司轉飭一律停止以清其源至停煎以後岸棧及場下所存重淋有數可稽變通較易本爵部堂推原滯銷之由全在價高二字當此場鹽壅滯與其減配而起紛爭不如減價而暢銷路貿易之道脫貨方可求財望梅何能止渴此一定之理候分札運司鄂局儀棧趕緊議詳核辦

光緒十三年十一月鹽政曾國荃批重淋場商稟乞減價
派運一案該商等已願將鄂局重淋酌減牌價與本爵
部堂議降之意相符足徵顧全大局所論草堰東何三
場礙難停煎亦未始無理惟重淋桶價既昂而又加工
煎鍊成本較鉅今經減價則場商之利比前減輕不停
則常年受累停則所減祇有此數迨存鹽售竣配額歸
還大眾獲益此不可不停者一也運商前稟內謂以頂
梁捏充未必果有亦難保必無然飭停之意並非因此
實因減價以後重淋場商必致剋扣桶價吝惜工本以
抵減價之數則是稟內所稱貿易之道首在划計本利

非法令所能勉強果爾於竈戶毫無裨益於鹽色礙難
講求利之所在弊卽隨之此不可不停者二也該場商
等旣免減配之累又冀常煎之利名雖減價而實占便
宜不特已經停煎各場難免異言卽真正頂三色場商
亦將起而言曰重淋不停配額無歸還之日何以待重
淋如斯之厚此不可不停者三也添置器具分場分垣
計之所費有限且時局變遷並無一定目前以重淋病
淮而飭停安知將來不以重淋勝川而復興該商等所
置器具儘可存留不必廢棄此不妨暫停者四也凡辦
事皆有次第聖經曰知所先後則近道此事須先停煎

而後可不減配不減配而後可議降議降而後可疏銷
三者缺一不可候札運司悉遵前批迅速會同局棧議
詳以示大公

光緒十四年正月署運司田國俊等詳查重淋創辦之始
各場俱有嗣因產多銷少陸續報停見僅草堰東何三
場照常辦煎署司見擬飭令一律全停自十四年正月
初一日起所收新鹽不得再有重淋名目草堰係屬頂
梁東何係屬全和仍令查照向章歸復舊制庶棧售牌
價有所率從而前停各場不致藉口其新收既停存鹽
擬降而售價必須斟酌盡善庶無偏枯重淋桶價較大

存堆亦久商本已屬匪輕如果比照下色不足以示公
允見擬仿照正梁牌價出售而正梁之中高下亦有不
同應卽一律酌中比照上新興正梁定價每包一千十
二文出售比上雖有不足比下亦已有餘較之重淋牌
價每包一千七十七文計減六十五文尙不致十分喫
重惟降價總非商願若不稍示體恤未免向隅查場商
厯因小包配數紛紛稟爭各懷私見當奉憲批與其減
配而起紛爭不如議降而暢銷路是重淋配數仍應照
舊全歸重淋所有小包遺額卽以大包抵補且重淋存
場存棧爲數尙多免其減配庶幾銷竣較速不致貽累

無窮署司等往返函商意見相同見在重淋配數鄂岸每票八十五引湘岸每票五十引此次酌減牌價係爲鄂岸銷滯起見所有湘岸每票五十引似可無庸議降經鹽政曾國荃批如詳照辦

淮南各場鹽色升降略

各場產鹽有尖和碱之分尖鹽內又有真正頂重淋四項之別呂四餘東真梁鹽色最爲上品而豐利金沙石港正梁次之新興草堰等十三場頂梁又次之和鹽爲下碱鹽亦名碱片係盤鏵底融結之塊鹽猶煮飯之鍋粃然其等差價值與頂梁相彷彿凡真正各場向不煎

產和碱餘西本列正梁光緒九年內提升眞梁廟灣場
同治三年降頂梁光緒八年復正梁專派搭銷湘岸以
上二場之鹽雖隨時升降牌價均未增減新興之上岡
本列正梁因光緒八年定爲專配鄂票產多銷少於十
二年改降頂梁如輪銷湘岸則牌價仍舊銷鄂岸則每
包減售十五文重淋向來無此名色光緒五年間鹽政
沈葆楨以鄂岸兼行川鹽必須多運上色方可疏淮敵
川乃通飭涵重各場將涵用灰重濾一次使涵氣澄清
然後入鍋煮成謂之重淋當時重之厠在餘呂眞梁之
列其色遜者案照頂和遞降然鹽雖潔白而味頗淡薄

岸商既苦耗重水販尤苦價高漸銷漸滯鄂局屢有減配之文當於十四年通飭各場一律停煎此場鹽升降變通之大略也

鄂湘西皖行銷鹽色略

鄂湘二岸引鹽定章以五百引爲一票專配真正頂三色同治八年鄂岸每票詳定真梁一百引正梁二百引頂梁二百引因其時餘西金沙豐利三場與呂四餘東二場同列真梁掘港柃茶角斜草堰新興廟灣六場與石港場上新興併場同列正梁也迨同治三年詳定以餘西金沙豐利石港上新興專歸正梁掘港等場改歸

頂梁光緒元年重定鄂岸每票真梁八十引正梁五十引頂梁三百七十引五年每票新添重淋七十引減去頂梁七十引六年內減正梁十五引加入頂梁數內計每票真梁八十引重淋七十引正梁三十五引頂梁三百十五引七年重淋減爲五十引頂梁增爲三百三十五引真正如舊九年每票加配重淋五十引頂梁減配五十引十年春因提銷樊城沙市又特增小包重淋五十引每票計大小重淋一百五十引真梁八十引正梁三十五引頂梁二百三十五引旋以重淋銷滯七月間減去大包二十引加配真梁二十引十一年又減小包

重淋三十引每票計大小重淋一百引真梁改爲一百
十引正梁三十五引頂梁改爲二百五十五引十二年
又減配大包重淋暨真梁各十五引每票定爲重淋八
十五引真梁九十五引正梁三十五引頂梁二百八十
五引至今仍之湘岸每票原定真梁五十引正梁五十
引頂梁四百引光緒六年因新辦重淋產數漸多請照
鄂岸一律搭銷於是每票定爲真梁五十引正梁四十
引重淋五十引頂梁三百六十引亦遵行至今西岸每
票亦五百引初行時專銷和鹽同治八年西局以吉安
府邊界兼銷碱鹽請改爲和鹽九成碱片一成十三年

復因碱銷暢旺改搭二成光緒二年冬以碱片壅積減
爲一成半光緒四年銷數大旺通飭各場多煎碱片從
丁丑春綱起暫搭三成丁丑秋綱恐產不敷配改爲照
舊二八搭銷五年從戊寅春綱起始一律普搭碱鹽三
成和鹽七成皖岸以一百二十引爲一票謂之小票行
銷和鹽內合肥巢縣廬江舒城無爲桐城滁州來安八
州縣原係淮北江運八岸今仍行銷北鹽全椒本屬淮
南食岸今亦附銷北鹽此各岸行銷鹽色搭配增減之
大略也

淮北鹽色

光緒四年三月鹽政沈葆楨札淮北場鹽非特太平中富色白粒大卽西臨之本池客池暨臨浦青口鹽色亦向勝淮南近年場商居奇往往於鹽販下場捆鹽時在應得鹽價駁價之外另行需索名曰貼色旋因貼色禁止不遂所欲每以低次醜鹽應捆卽籤掣上中戶亦僅得捆下戶之鹽其籤掣下戶者更不可問以致到壩後鹽色花雜出售較難湖販運抵正陽每開一輪水販先揀好鹽承買賸下醜鹽不能脫手遂有放欠搭貨等弊行戶高下其手跌價低套弊不勝言銷數日疲未始不由於此查太平中富兩局產數最多居通綱三分之一不

患無上色好鹽見已開辦甲戌新綱正值票販捆運之際若不嚴加整頓何以暢銷市而裕課餉該分司卽便轉飭場局各員諭飭各局商傳諭各垣商本綱務照籤派鹽色一律應付好鹽儻敢再以醜鹽掙交許票販稟由分司查明扣捆改掣他垣之鹽追繳鹽價將局商詳明斥革垣商議罰以爲不顧大局者戒一面飭催票販乘此場河水勢充足刻日赴場捆運儻票販觀望誤運亦應詳請扣引

光緒五年五月海州分司于寶之詳查淮北鹽色雖有上中下戶之分向以色粒爲等次色白粒大或色紫粒大

者爲上戶色白粒中者爲中戶色白粒微或色青粒細者爲下戶其有泥沙黑鹽者或由於池老甄酥或由於腳鹽羈雜或由於澄滷未清或由於灑埽非時出場後又有不肖船戶中途盜賣往往羈雜泥沙到壩進棧時又有無知棧夥以捆鹽時拋撒泥鹽灌包上廩以致鹽色不無花雜湖販買鹽出棧上船後長湖數百里船戶沿途偷賣抵換等弊亦所難免非嚴立章程層層有所箝制不足以清弊竇所有場下清理池垣稽查灑埽責成場員議章稟辦其到壩進棧出棧卑職抽驗後令棧戶湖販各員驗放清單當經分別出示曉諭札飭遵照

去後茲據三場大使局員詳稱查淮北之鹽全資曬埽而天時地利人力三者缺一而不能成有海鹽灘鹽之分有上中下戶之別太平中富引潮水曬埽者爲海鹽西臨朐山臨浦青口汲井水曬埽者爲灘鹽大都池面離海愈近潮水愈足滷氣愈厚色粒愈佳工力愈勤出鹽愈旺此不易之理太平所產者上中下三色俱備中富僅有上中而無下戶蓋池面距海有遠近之不同也其上中二色又有紫白之殊中富色紫而粒大太平色白而粒次之其下戶或因限於地勢潮水無由上達或因海遠灘高滷氣因之淡薄往往有色而無粒實地氣

使然也若西臨朐山臨浦青口雖同係下戶然鹽色之優劣在乎井水之淡濃收數之盈虛全視人力之勤惰而所埽之鹽亦有潔白如霜者足可與淮南呂餘真梁並駕齊驅在淮北皆目之爲下戶因無大粒故也其間偶有硝鎗或因日烈風微鹵老甄酥而起或因風寒日淡鹵不周地而生其色雜黑黃者亦由池老甄酥所致卑職等責有攸歸敢不正本清源力求整頓當卽督飭局商悉心籌議因呈整頓鹽色章程六條 一海遠灘高鹵氣不升池面應行移鋪見已飭委會場確查飭令移鋪其池老甄酥尙堪修理池面勒限三箇月購辦新

輒趕緊修理限內未及修好應派額引准本商擇鹽多色佳之垣自行稟請借撥如逾限一月以上應將本垣額引改撥他垣應販如逾限三月者池垣永遠封閉撥歸首先修整池產曬埽好鹽之垣難派應捆以示勸懲

一竈產之鹽見飭商竈不惜工本認真套曬如果天時不齊鹽色偶有花雜立即押令回滴重灑方許入垣其收鹽入垣時應責成各該垣本商督同司事帶領掌管竈差人等逐筐查驗竈丁儻敢朦溷以醜鹽掇交立即送場分別押逐嚴辦一票鹽由垣開捆時責成本商督同司事以及工人務將廩腳掀頭泥鹽剔除盡淨

不准躉入包中仍一面飭令駁鹽船戶眼同逐包查看
設或陽奉陰違許看捆本販或販夥知會局商報場卽
將該垣夥押逐垣商額引扣派一綱以示薄懲 一太
平中富臨浦之鹽向係由垣駁堰交販請掣開掣時責
成場員局員逐包查驗如有鹽色不符卽係有心朦混
准票販稟報場局查出何垣之鹽卽將何垣池產稟請
充公如票販礙於情面不肯實稟一經場局各員查出
卽將票引一併註銷局商扶同徇隱立予斥革其西臨
胸山以及臨浦正場之鹽向係廩下交斤應由局商於
開掣時協同本販或販夥弔取鹽樣送呈如果色粒不

符卽係扶同隱漏局商垣商一併照辦如垣商意圖勒索指不交鹽或有意以好鹽驛和泥沙致礙銷市者查出後應加等懲治除將池垣充公外並指提本垣主嚴究詳辦 一場鹽捆掣上船時由船戶當時驗收到壩進棧時報明卑職帶同西壩卡員親往抽驗並飭該卡員按旬具報如查有泥沙黑鹽或上中下戶鹽色不符查係船戶中途盜賣驛和抵數者卽提船戶究辦船隻鋸毀示眾如查係出場原鹽並非船戶舞弊應將失察之場員初次摘頂二次撤任局員初次記過二次撤差局商斥革垣商池產查封充公票販礙於情面甘受欺

朦者票引一併註銷如係在場稟明有案者免議 一票鹽進棧飭令各棧戶驗明鹽色相符卽由棧戶出具驗收單聲明並無泥沙黑色字樣隨時送呈卑職存案出棧時如有泥沙黑鹽卽係棧戶舞弊一經湖販具稟或由卑職及西壩卡員查出卽將棧戶查封不准更名復開湖販買鹽訂交時責成湖販查驗鹽色如有泥沙黑鹽准其在壩就近稟明究辦儻驗明鹽色相符卽令出具驗放收單呈送卑職衙門備案一面在於大票上加蓋上中下戶並某湖販驗明無泥黑鹽字樣各戳記再由五河正陽兩卡查對辦理經鹽政沈葆楨批准照

辦

光緒五年十月分司于寶之稟奉札飭丙子綱票鹽售價除中色仍照定章外其上色每包酌增二分下色每包酌減二分如此辦理庶足以示勸懲而昭平允卑職當經出示曉諭並札西壩卡員傳諭各販自八月初一日起遵照加減之數分等出售業經遵辦在案茲據票販順興振鴻慶等稟稱販等乙酉綱之鹽所餘無多並遞撥之十餘萬包約已不足二十萬包其中上色之鹽已將售竣卽閒有存者亦名爲上色而實非最高之貨可否於一兩一錢二分之下添列一兩一錢一等又中色

定價一兩八分亦有雖係中色而不能多粒者可否添
列一兩六分一等共成五等似更周密核實至下戶臨
青等局之鹽最爲難售本不能與太中並列今全行歸
入一兩四分一等則關下之販或可貪賤專運下色關
上之銷自可暢旺矣祈察核轉詳等情卑職查該販等
所稟上色之次者改售一兩一錢中色之次者改售一
兩六分其下色者仍照一兩四分出售連舊定之上中
下三等共成五等所議尙屬允洽惟臨青之鹽較西胸
又次若統爲下戶不示區別恐難服湖販之心卑職詳
加察核應將下戶中之臨浦青口極次鹽色定爲下下

其價每包減售一兩二分合成六等每等皆以二分遞減與正陽稟定九等之案方相符合經鹽政沈葆楨批准如稟辦理

七

兩淮鹽法志卷三十四